

## Ilaqutariit aaqqissuussaanerini pissutsit allanngorput

Allattoq: Ellen Bang Bourup

Ullutsinni ilaqtariit aaqqissuussaanerat qangamut inooriaatsimut naleqqiullugu allaanerujussuuvoq, ilami inuiattut ilaqtariittullu inooriaaserput allanngorsimaqaaq, nunarsuarmioqataalernikuuvugullu. Ilaqtariit aaqqissuussaanerat qangaanerusoq imaakkajuttarpoq anaana ataatalu illoqataasut immaqalu aamma ilaqtat allat – aanaa, aataa, ajakkut, angakkut assigisaallu ilagalugit illoqatigiittoqartarpoq perorsaanerlu ataatsimut ingerlanneqartarluni. Ilami illoqarfii nunaqarfii ilaanni suli taamatut ileqqoqarneq ingerlanneqarpoq.

Ullutsinnili ineriaartorneq arlaatigut pinngitsoorneqarsinnaanngitsumik sunnerneqarneq ilutigalugu ilaqtariittut ileqqut aaqqiissuussanerpullu allaalluinnarpoq assigiinngisitaarlunilu. Ullutsinni ilaquaareeriaatsit soorlu imatut isikkoqarsinnaapput:

- ✓ Anaana ataatalu ilagalugit peroriartorneq
- ✓ Marlunnik anaanaqarluni peroriartorneq
- ✓ Marlunnik ataataqarluni peroroiartorneq
- ✓ Anaana kisimeeqatigalugu peroriartorneq
- ✓ Ataata kisimeeqatigalugu peroriartorneq
- ✓ Arlariinnik angajoqqaqarluni peroriartorneq
- ✓ Meeravissiatut peroriartorneq
- ✓ Meerarsiatut peroriartorneq
- ✓ Ulloq unnuarlu angerlarsimaffiani peroriartorneq
- ✓ Aanaakkunni/aataakkunni peroriartorneq
- ✓ Ilaquttani allani peroriartorneq
- ✓ Qatanngutini peroriartorneq
- ✓ Allat

Ilaquaareeriaatsit allanngorsimanerat ammasumik inuiaqatigiit iluanni - angerlarsimaffinni, meeqqerivinni, atuarfeqarfinni, upperisarsiornermi, inunniq isumaginninnermi, politikkikkut il.il., annertunerusumik eqqartorneqarneq ajorpoq. Naak ileqqut allanngorsimagaluartut suli ilaqtariit eqqaaneqaraangata "qangatut" ilaqtariit aaqqissuussaanerat takorloorneqartarpoq. Atamigoq atuaqatigiinnut imaluunniit meeqqerivimmi init arlaannut iseriarta. Meeqqammita qassit angajoqqaatit tamaasa najorpaat? Imaluunniit meeqqamita qassit angerlarsimaffiup avataani inissitaappat?

### *Meeqqat pisinnaatitaaffii*

Ilaqtariittut ileqqut eqqartorneqaraanngata aamma meeqqat pisinnaatitaaffi annertunerusumik eqqartorneqarneq ajorput. Allaat naapitassaalernikuovoq meeqqat angajoqqaat akornanni pigisatut pinnaassutigineqartut meeqqat pisariaqartitai pisinnaatitaaffiilu qissiminnguarnagit!

Uani erseqqissarusuppara qanorluunniit ilaqtariit aaqqissuussaangaluarpata meeqqat tamarmik pisinnaatitaaffeqarmata angajoqqaaminiit illersorneqarlutillu isumassorneqarnissaminut. Tamanna pisinnaanngippat naalagaaffik pisussavaq tamanna eqquutissallugu. Qulaani pineqartut tassaapput akisussaaffimmik/pisussaaffimmik tigusisuullutik eqquutitsisussat.

Artikelini ukunani Meeqqat Pisinnaatitaaffii pillugit imatut allassimasoqarpoq:

**Artikel 2, Naligiisitaaneq assigiinngisitaannginnissamullu illersugaaneq:**

Meeqqat tamarmik assigiimmik naleqarput, namminneq angajoqqaamilluunniit amikkut qalipaataat, oqaasii, niviarsiaraaneri nukappiaraaneriluunniit il. il. apeqqutaatinnagit sunulluunniit tamarmik assigiimmik pisinnaatitaaffeqarput.

**Artikel 5, Angajoqqaanik siunnersuineq:**

Pitsaasumik inuuneqarnissamut angajoqqaat sapingnisamik iliuuseqassapput. Angajoqqaat akisussaanerat naalagaaffiup ataqqissavaa, pisariaqarfiinilu ikuutissalluni.

**Artikel 9 & 10, Angajoqqaat meeqqaminnik illersuinerat:**

Angajoqqaat najugaqatigiinngippata angajoqqaami marluusut ilagisarnissaat attaveqarfiginisarnissaalluunniit meeqqap pisinnaatitaaffigivaa.

**Artikel 18, Meeqqanik perorsaaneq:**

Meeqqap pisinnaatitaaffiinut angajoqqaat pingarnertut akisussaanerat naalagaaffiup qulakkiissavaa.

**Artikel 20, Meeqqat iliarsunngortut:**

Meeqqat iliarsunngortut naalagaaffiup ikuussavai.

**Artikel 21, Meeravissiartaarneq:**

Meeravissiartaarneq aatsaat meeqqamut pitsaanerpaaillugu meeravissiartaartoqassasoq naalagaaffiup qulakkiissavaa.

**Artikel 25, Meeqqat inissitaagallartut pillugit piffissani aalajangersimasuni nakkutilliineq**

Naalagaaffiup qulakkiissavaa piffissani aalajangersimasuni meeqqat angerlarsimaffiup avataani inissinneqarallarsimasut ajunngitsumik atugaqarnersut nakkutigissallugit.

Neriuppunga inuaqatigiit akornanni ilaqtariittut aaqqissuusaanermi ileqqut allangorsimaneri pillugit isummersorlusi oqallikkumaartusi Meeqqat Pisinnaatitaaffiini artikelit aallaavigalugit – oqallilluarisi!